

بِسْمِ اللَّهِ الرَّحْمَنِ الرَّحِيمِ



## Khutba Jummah

*Hazrat Khalifatullah Munir. A. Azim (atba)*

06 Décembre 2019  
09 Rabi'ul Aakhir 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

### [HADITHS LOR LE GHIBBAT... \(PARTIE 2\)](#)

*Alhamdulillah, Summa Alhamdulillah*, aujourd'hui aussi mo contigner mo série de Khutba lor Surah Al-Hujurat, et bane Hadiths lors sujets de « *Ghibbat* » (la médisance, faire palabre), pense mal pour les autres et veille z'affaires dimounes etc.

Mo cite alors ene 2<sup>ème</sup> Hadith ki bien longue et ki trouve dans Muslim et aussi dans Bukhari, *Kitab-ul-Adab*.

Hazrat Abu Huraira (ra) rapporter ki Hazrat Muhammad (saws) fine dire : « Évite gagne soupçon, parski soupçon li le plus pire mensonge dans ene causer, et pas bizin curieux et rode conne z'affaires les autres et pas espionne les z'uns les autres et pas jaloux les autres, et pas cultive aucaine méchanceté [malice] et pas bizin ena kit répugnance et hostilité contre ene et l'autre. And vine bane frères et bane serviteurs d'Allah. »

Dans ene l'autre version de sa Hadith là, ki rapporter dans Muslim, Hazrat Muhammad (saws) pé dire nous pou reste protégé de *badzani*, mal pense ene dimoune, parski *badzani* c'est ene mauvais sorte de mensonge. Pas reste engager dans rode défauts les autres. Pas bizin espionne ou bane frères, pas bizin ena la gourmandise pou gagne bane bonnes choses, pas bizin ena la jalousie, pas bizin ena l'ennementé, pas bizin ou insolent. Pas bizin casse relations avec ou frères. Vine bane serviteurs (*banda*) d'Allah et zot bizin reste comme bane vrai frères. Ene musulman li ene frère pou ene lot musulman. Et zot pas commette bane injustices entre zot. [Ene musulman] li pas abaisse so frère et non pli li humilier li.

Et Hazrat Muhammad (saws) fine aussi pointe so lédoigt en direction de so lécoeur et dire ki *Taqwa* li trouve là.

Bane traducteurs de sa Hadith là fine comprend li ene façon, ki le cœur c'est sa place kot ena *Taqwa* là. *Taqwa* li trouve dans lécoeur. Mais moi mo comprend li comme sa ki le cœur li le vrai mesure de *Taqwa*. Sinon péna aucaine les autres mesures ki capave acceptable si li différent de sa. Kan en pointant vers so le cœur Hazrat Muhammad (saws) pé dire ki *Taqwa* c'est trouve ici; bé li pas ti ouler dire ki c'est dans le cœur ki ou pou trouve le *Taqwa*. Non, sinon couma pou alle conner dans ki le cœur ena le *Taqwa* et dans ki péna. Ena des billions lécoeurs coumsa kot péna même ene ti trace de *Taqwa*. Donc, sa pas veut dire dans le cœur. Si zamais aussi li veut dire dans le cœur, bé à ce moment là li pou veut dire ki c'est zis à propos de so lécoeur ki Hazrat Muhammad (saws) pé fer référence, c.à.d., dans so le cœur ki ena le *Taqwa*. Si zamais ou ena pou apprane le *Taqwa*, bé apprane avec Hazrat Muhammad (saws) même.

Péna aucaine autre moyen, aucaine autre chemin pou comprendre la réalité de *Taqwa*. Alors dans sa sens là, tous bane paroles ki li fine dire lors *Taqwa* zot en fait bane descriptions de *Taqwa*. Ou capave réfléchi et guetter dans ki bane places nous gagne cogner et tomber. Pou protégé nous de sa bane places là le Saint Prophète (saws) fine mette bane panneaux de signalisation. Et ene signalisation de *Taqwa* c'est la protection.

Donc, li veut dire ki : Moi mo pé dire zot kot ena bane obstacles, kot ena bane virages difficiles, kot ena bane pièges, et alors mo pé fer zot comprend ki bane dangers ena devant ou. Dans sa voyage de la vie là, guette bien mo bane

panneaux de signalisation. Et na pas alle à l'encontre de sa bane directives là sinon ou pou tombe dans bane difficultés.

Ensuite li fine dire ki ene musulman, le fait même ki li critique ene lot musulman sa même suffit comme ene mal. Ena trois zaffaires d'ene musulman ki *Haram* lors ene lot musulman :

1. C'est so disang,
2. So l'honneur, et
3. so di biens.

Allah pas guette bane beautés du visage, ni beauté de ou le corps et ni Li guette ou di biens. Allah Li guette seulement ou le cœur.

Et dans ene lot Hadith mentionner ki Hazrat Muhammad (saws) fine dire ki pas bizin ena la jalousie entre zot, pas bizin ou alle gâte bane deal, bane marché [business] de bane les autres. Pas bizin demande ene prix trop fort, ki exorbitant afin pou attire bane clients et pou fer sa kitchose là gagne plisse valeur ki li mériter. Reste comme bane *banda* sincères.

Alors là-dans fine mentionne tous sa bane dangers ki généralement zot la cause de détérioration et déclin de la société. Et fine mentionne sa si ouvertement, ki dans nous communauté (*Jamaat*) - le **Jamaat Ul Sahih Al Islam** - nous bizin surveille nous bane actions à la lumière de sa bane Hadiths là. Si nous faire sa analyse là, bé premièrement nous pou peiner pou constater ki nous ena encore beaucoup à faire. Nous ena beaucoup de réforme à faire parski là-dans fine mentionne beaucoup bane zaffaires ki généralement même dans bane bons dimounes zot présent jusqu'à ene certaine point, ene certaine degré. Et jusqu'à ene certain degré même sa bane bons dimounes là capave alle tombe dans sa bane pièges là.

Donc, kan sa bane racines de mal là toujours présent, bé n'import kan, ou sois n'importe kan saison changer, bé bane mauvais plantes capave pousser de sa bane racines là. Donc Hazrat Muhammad (saws) fine mentionne tout sa bane racines là, et li pas nécessaire ki tout les temps, tous bane dimounes trouve bane racines là. Sakaine de sa bane zaffaires là zot ena sa potentiel là ki zot capave pousser et vine bane très mauvais piés. Ene pié céki rapporte bane tels fruits ki

capave faire bane *Jannat* changer en *Jahannam*. Alors sa pié là défanne, parski c'est ene pié ki enlève le *Jannat*. Nous, nous ena pou appelle bane dimoune vers ene *Jannat* dans sa le monde là même et ki aussi ene *Jannat* du ciel. Ene tel *Jannat* ki bizin change situation de sa le monde là. Et sans ki nous crée sa *Jannat* là dans nous *Jamaat*, bé couma nous pou capave appelle bane les autres vers sa ?

Alors ena ene lé temps pou bane discussions, ena ene lé temps ene saison pou dissipe bane désaccords à travers arguments. Mais l'époque d'aujourd'hui demande nous plisse ki à travers nous bane actions nous présente ene tellement joli société [*Jamaat*] au monde ki bane dimoune kan guette sa zot senti ki sa c'est ene *Jannat* vers laquelle zot bizin vini, sinon zot pas pou gagne la paix et tranquillité.

Sa bane zaffaires lors laquelle mo pé cause are ou là, c'est bane zaffaires ki arriver dans sak la caze. Zot bane tel zaffaires ki péna seulement connexion avec bane grand la ville ni avec bane sociétés de bane intellectuel. Li concerne sak la vie de sak dimoune. Que ce soi ene zenfant ki pé grandi dans la rue, ou soi ene zenfant ki pé nourri dans château. Li ena connexion avec tout, avec bane pauvres aussi et avec bane riches aussi.

Alors écoute avec attention ki sa c'est bane zaffaires ki nous bizin reste loin avec sa. Lerlà, ene bane pou bizin vine vers nous parski zot pou trouve sa *Jannat* ki Allah fine permette ou pou créer là, par la façon ki ou comporte ou, par sa Islam ki ou réfléchir dans ou kan ou fine suive bane directives d'Allah et de Hazrat Muhammad (saws) pou ki ou reste loin avec bane *Jahannam* de sa le monde là. Sinon, ni nous pou gagne *Jannat* et ni nous pou digne pou donne *Jannat* aux autres.

Le Saint Prophète (saws) dire ki protège nous de *badzani* parski c'est ene mauvais kalité mensonge, et mal pense ene dimoune li sitant commun dans nous société ki beaucoup de fois avec *badzani* et *ghibbat*, ena encore bane z'histoires ki continuer fabriquer aller même. Ene dimoune capave dire untel fine faire tel zaffaire et peut être lot dimoune là fine faire li dans ene lot façon de saki sanlà pé raconter. Alors parfois ou étonner kan ou faire l'enquête, ou alle constater couma li fausse.

Par exemple ene quelqu'un fine dire moi ene kitchose lors ene dimoune et moi mo ti conner ki saki li pé dire moi là li complètement fausse. Ler mo fine faire l'enquête et mo fine demande dimoune ki fine dire moi sa là un peu plisse détails, bé mo fine recevoir vraiment ene réponse bien étrange. Li tire so cannette dans jouer, et dire ki saki li pé dire la vérité et ki lotte dimoune là fine dire vraiment tel et tel zaffaire. Bé moi, à ce moment là, si mo pas ti conne la vérité, alors mo ti pou capave pencher vers saki sa dimoune là pé raconter lor lotte là-là, et si moi mo pas ti prend mo précaution, alors mo ti pou capave alle tombe dans so la sauce et croire li et alle pense mal pou sa dimoune là ki vraiment capave li fine bizin fer sa kitchose là [d'après céki sanlà pé raconter]. Et alors, si moi astaire mo alle propage sa causer là, d'après céki moi mo fine tender ; parski zis saki mo fine tender mo raconter, alors mo pas ti pou alle cause aucaine menti dans céki mo fine dire, parski mo fine tende causer là coumsa. Mais Hazrat Muhammad (saws) fine dire ki sa c'est ene pire sorte de mensonges. Sa estimation là même ene mensonge. Ou fine alle pense mal lor ene l'autre et ou fine propage sa causer là plus devant avec les autres. Couma eski ou fine capave penser ki causer ki li fine dire là vrai ?

Alors c'est même mauvais résultat ki ou fine retirer ki sa dimoune là aussi fine tirer. Li aussi fine capave pense mal pou sa dimoune là et fine participe dans fanne sa causer là. Et kan à ou, ou pas fine faire aucaine recherche nannié, nek ou fine avance causer là pli devant. Et ou fine tire ou propre conclusions. Li ene très mauvais façon ki alle totalement à l'encontre de conseil de Hazrat Muhammad (saws). Et c'est parski dimounes fine donne l'importance à sa bane zaffaires absurdes là ki la société fine gâter nette. Et c'est dans sa bane kalité *badzani* absurdes là même ki bane dimounes haut-placer et intellectuel impliquer là-dans. Bane ki ena ene bon connaissance de la religion zot aussi faire sa.

Ensuite li (saws) fine dire ki reste éloigner de rode bane défauts de bane les autres. Ena beaucoup de bane désordres coumsa surtout dans nous la société. Li tellement ene mauvais l'habitude ki si ou analyse li pli profondément, bé so raison c'est-à-ki, kan ene dimoune li trouve ene l'autre pli meilleur ki li et li conner ki li péna bane capacités pou vine couma dimoune là, li conner li pas pou capave dépasse lot la dans *Néki*, bé lerlà li envie abaisse lot dimoune là, li envie dégrade li. Et c'est à cause de sa ki li rode défauts de sa dimoune là. Li penser : *Puisque dimoune là ena l'honneur, mais mo pou faire ene manière rode so bane défauts et dire la société guette sa dimoune là so réalité.*

Et celui ki avec mauvais l'intention rode sa bane défauts là, certainement li faire bane mauvais penser aussi, et ensuite kan à travers espionnage li réussi conne faiblesses et défauts de sa dimoune là, bé là aussi Allah et So Rassool (saws) pas fine donne droit pou alle propage sa. Sa aussi la société islamique pas fine donne ou aucaine droit ki ou lève sa bane causer là, et propage sa publiquement. Oui, li ou devoir dire sa à bane ki responsables du *Nizam-e-Jamaat* [pou ki zot faire *tarbiyyat* de sa bane dimoune là]. Mais ou bizin dire bane causer ki vrai.

Donc, dès le commencement fine empêche propage sa bane causer là en publique. Au contraire, ena bane situations kot Allah et So Rassool (saws) fine prescrire 80 coups de fouettes pou sa. Kan même saki ou fine dire là fine arriver vraiment ou sois pas fine arriver. Si ou pas rempli condition ki Quran fine mettre à propos bane témoins etc., ou fine propage ene zaffaire ki ou pas ti ena droit fanner, bé ou bizin gagne 80 coups de fouettes. Donc, bizin faire bien attention pou pas alle dépasse limites. Bane dimoune ki mal pense ene lot dimoune et mal pense ene situation, zot mal penser, zot estimer et zot calculer par zot même et ensuite pou zot propre plaisir, zot propage sa dans la société et zot empoisonne la société nette.

Ensuite fine dire ki pas développe la gourmandise pou gagne bane bonne choses. Guette couma fine lier sa deux zaffaires là. Espionnage et gourmandise pou gagne bane bonnes choses li lier. Et c'est sa même sa point psychologique ki mo ti pé explique ou là, kot ou trouver ki ene lot dimoune ena ene bon zaffaire et ou développe sa désire là pou gagne sa. Kan même li l'honneur ou dibiens ou sois bane les autres grades mondaines. Si ou trouver ki ene lot dimoune ena li et ou développe ene l'envie pou ou gagne sa ou même, c'est sa l'envie là ki beaucoup de fois force ou pou prend revenge lors lot dimoune là. Et ene sorte de revenge c'est ki ou rode so bane défauts et propage li dans la société.

Ensuite fine dire ki pas bizin ena la jalousie. Si ou trouve bane bonne choses dans ene lot, ou gagne la jalousie dans ou le cœur. Pou sak zaffaire ki présent dans nous nature, li ena deux aspects et Hazrat Muhammad (saws) fine mentionne tous les deux aspects devant nous. Ene, c'est pareil couma pé mentionner dans sa Hadith là ki ou pé trouve bane bon zaffaires dans ene dimoune et ou trouve li meilleur ki ou et si ler ou trouve sa bon là dans li, sa cause ou la peine. Lerlà n'importe ki sentiment ki découle de sa, c'est la jalousie. Si ou content ler ou guette sa, bé c'est ene l'envie ki vine dans ou pou être pareil couma sa dimoune là, et sa c'est pas la jalousie. Hazrat Muhammad (saws) pas fine défanne pou gagne

sa l'envie là ou aussi pou faire bane travaux pareil couma sa dimoune là mais li fine mette l'emphase lors la jalousie, li fine défanne même pou être jaloux. N'importe kan ou trouve ou frères dans ene bon situation, et sa l'heure là ou content au fond du cœur, là bizin ena ene analyse ou le cœur profondément, et ou même ou pou conne ou plisse si pas ou pé montrer sa contentement là juste devant dimoune là, mais ki ou lé cœur ena ene l'autre zaffaire (la jalousie) ou sois, ena vraiment ene contentement ki vine du profond ou le cœur pour li, et ou envie suive so l'exemple seulement, sans kit tâche de jalousie malsain.

Par la grâce d'Allah, Allah (swt) fine donne moi sa *Tawfiq* là pou mo comprend sa bien et surtout kan mo ti pé travail lors bane l'île avoisinants dans Jamaat Ahmadiyya et avec l'aide d'Allah, et Allah So grâce, à sak fois ti ena bane succès, et kan mo retourner, ena bane membres du Jamaat Ahmadiyya ki vine vers moi et montrer zot appréciation et félicite moi à sa l'époque là. Allah (swt) ti mette dans mo le cœur pou conner ki sanlà parmi tous sa bane là ti vraiment sincères dans zot appréciation et félicitation et ki sanlà ti pé dire sa juste lors la lèvre mais pas ti au profond de zot les coeurs et c'est sa même fine arriver au commencement l'année 2001. C'est sa même bane dimounes là fine manifester zot et sa tous les temps mo ti garde sa dans ene coin dans mo le cœur kot deux ou trois fois dans zot l'annonce ki faire après Jummah, kot zot mentionne succès ki mo fine gagner lors bane l'îles, voilà kan mo fine rentre au pays, mo ti pé comprend sa bien sa l'époque là kot ene la voix dans mo z'oreille dire ki : *Lors sa même mimbar ki soi-disant pé faire to éloge là, lors sa même mimbar là zot pou humilier toi ; c'est purement hypocrisie.*

Dépi sa, à sak fois kan mo ti pé rentre dans pays, kan faire bane annonces lors mo travail mo ti pé gagne ene dégoût. Donc, Allah (swt) So bane messages fine réaliser kan même après impé les temps, mais li fine réaliser. Et azordi ene jour extraordinaire [le 06 Décembre 2019], kot sa marque ene date historique – le 06 Décembre 2003 – couma Allah fine élève moi comme So Muhyiud-Din, Li fine accompli So promesse, pou ki mo mette bane croyants et la société en garde contre bane mals ki dérouler, afin ki zot capave sapper avec l'enfer (*Jahannam*) et gagne paradis (*Jannat*) pas zis dans *Aakhérat*, mais commencer dans sa le monde là même. Mo pas fine vini pou guette mo propre profit, mais c'est Allah ki fine élève moi comme So serviteur choisi, ene Revivificateur de la Foi pour faire revivre la foi, pour faire revivre l'Islam et l'humanité dans le cœur et l'âme de bane dimounes.

Avant mo terminer, mo tenir à remercier tous mo bane disciples ki fine envoie moi bane paroles bien encourageant en sa date historique là. Mo remercier zot pour zot bane *duahs*, et zot l'amour ki zot montrer. En vérité, après tant d'épreuves et de découragement, kan maintenant Allah manifester So bane faveurs immenses [*Fazlil-Azim*], alors li vraiment ene la joie pou partage sa bane moments de bonheur là avec bane ki vraiment sincères, bane ki ena ene l'amour pour Allah et So Khalifatullah et pour la vérité et bane faveurs ki Allah fine déverser en sa siècle là.

Mo faire *duahs*, ki Allah béni tous mo bane disciples sincères dans le monde. Ki Allah continuer renforci zot la foi, et garde zot loin avec tous bane mals ki Li et So Rassool bien-aimé, Hazrat Muhammad (saws) fine mette nous en garde. Ki nous maintenant, bane musulmans du Sahih al Islam nous prend lor nous sa travail béni là pou dirige bane dimounes vers le *Jannat* de sa le monde là et le *Jannat* éternel de l'au-delà. *Insha-Allah, Ameen.*